

Landesbibliothek Oldenburg

Digitalisierung von Drucken

Jahrbuch für das Oldenburger Münsterland

Vechta, Oldb, 1969-

Gretchen Grosser: Schoule ättern Krieg

urn:nbn:de:gbv:45:1-5285

Gretchen Grosser

Schoule ättern Krieg

Nu gunge do Suumer-Ferien foar uus Schoulbäidene al boalde tou Eende. Do maaste sunt ja uk wäil in Urlaub weesen, fillicht sogoar uk in't Uutlound. Tou uus Baidenstied waas deeran ja goar nit tou toanken. Dät waas ja inne Krieg un fluks ätterdäm. Wie bleeuwen in Huus, spielden Hüüsken in Umme Heede of in Onnol's Dannen un Foutbaal of Völkerbaal in Haiks sien Plakke. Wie moasten oaber uk uus Oolden ful hälpe inne Ferien.

Iek waas bliede, as wie 1945 ättere Suumerferien wier ättere Schoule gunge kuden. Die Krieg waas tou Eende. Wie hougeden nu neen Nood moor foar Tieffliegere tou hääben. Inne Schoule waihde nu en gans uursen Wiend. Wie hieden nu en Koaster kriegen, uus Koasterske waas nu inne Roomelster Schoule. Büngr hougede naan Stok! Oaber nu roate dät „Übungsarbeiten“. Stroafoarbaid namde hie do nit. Un wie hieden niks tou Schriewen! „Schreibt auf Zeitungsrändern!“ kwaad uus Koaster dan. En Zeitung hieden wie in Huus oaber uk nit. So hääbe iek nu eerste noch blouked, dät mien Suster hie Läkse in een oold Kontobouk fonne Raiffeisenkasse moaked hiede. Uus Määme hiede noch wät fon uus Schoulseeken in hie „Nachlaß“. Deer hääbe wie uus mädnunner gjucht uur amüsiert.

Uus Laie bruukten wie ja foar do „Hausaufgaben“. Wie hieden uus uk Schiefer uut Thederings Villa hoalt. Dät Dak waas kuut fonne Krieg, un buppe in do Koomere liegen Stukke fon düsse Ponnen. Näie Laien kude man do noch nit fluks wier koopje. Dät liet ja gjucht oarich, sukke Fätskene fon Laien, aal hieden do en uurs Fonsuun. So behoalpen wie uus dan eerste.

Wan wäl sundeeges nit ättern Läästtjoonst weesen waas, koom hie moundeeges inne Schoule fluks dran. Säärke un Religion waas foar uus Koaster een un alles. Kreech hie uus nu annewaine fääst un wie wisden neen Oantwoud, waas en „Übungsarbeit“ fällich. „Schreibt euch eure Fingerwund!“, so kwaad uus Koaster oafter. Iek weet noch gans seküür, dät iek eenmoal füftichmoal schriewe moaste: Vor dem erweiterten Infinitiv mit



„zu „ steht immer ein Komma“. Dät hääbe iek tiedlieuwends beheelden. Inne eerste Uure hieden wie altied Religion. Dät koom oafter foar, dät düsse Uure bit tou de Hoolf-Schoultied geen. So jadden moate uus Koaster uut de Bibel un Kathechismus fertälle, leese un heere. Wie moasten so alles uutwändich leere un wiete, ful deerfon hääbe wie do nit moal is fersteen.

Dät eene mout iek oaber kweede, wie hääbe inne Schoule goud wät leerd, un dät sit, mai weesen hääbe wät wol. Uus Koastere wieren oafter tou stromm mäd uus, fillicht hääbe jo dät oaber daach goud mäd uus meent.

Gretchen Grosser

Do Oolke

In Hollenerfoan in't Seelterlound lait die Hollebierich. Deer hääbe sik toufoarne do Oolke apheelden. Jo hääbe do Ljude ful Schoaden moaked. Do Oolke kude me silläarge nit sjoo, un deeruum kuden jo tou älke Tied Tällere, Potte un uurse Reewen wächhoalje. Nit säilden gebörde dät, wan n'Faune do Bäiste milke wüül, dät do Oolken dät dan al dän hieden.

Eenmoal hääbe düsse Oolke n'littjet Wucht roowed. Dät lieuwde do ful Jiere mäd düsse Dwerge in dän Hollebierich, wier jo hiere joope Goate hieden. As oaber ättern loange Tied deer moal aan Käärdel uut Hollen an dän Bierich foarbiekoom, stuid dät Wucht juust buute. Die Mon hääd do gau dät Wucht wier meenuumen in sien Täärp.